

HANNAH AYAK IDEM ỌNỌ ABASI

(Ukpep-ńkpọ ke Abańa Usen Mme Eka)

1 Samuel 1:1-28

ỌYỌHỌ UKPEP-ŃKPỌ 71

Eke Mkparawa

IKỌ IBUOT: “Kpono usọ ye uka (emi edi akpa ibet eke asańade ye uńwońọ)” (Ńwed Mbon Ephesus 6:2).

Kpukpru Ini Nsuhọ Odu

Ke eyo mme ebierikpe, mbemiso Israel enyene edidem, ńwan ye ebe kiet emi ekesońode eda ye Abasi ema edu emi ekekerede Hannah ye Elkanah. Ke ndiwut ima mmọ ye Abasi, mmọ ema esuk ibuot enọ ewuhọ Esie, ke ndikatuak ibuot nnọ Abasi ke Ataya nnyuń mbuana ke mme usọrọ Abasi ke isua ke isua. Idaha nditọ Israel ke spirit ama osuhore eti-eti ke ini ntem, nnyin ikut ite Abasi kpukpru ini esinyenyene ekpri otu emi enamde akpanikọ enyuń enamde ńkpọ enọ Enye ekpedi ke idem ini emi mbuk owutde nte ufọk-Abasi okodude ke ata ekim.

Hannah okoyom eyen-eren, edi mme isua ema ebe ndien enye isuk inyeneke baba eyen kiet ndima nnyuń mkpeme. Emi ama anam enye ofuhọ eti-eti. Ekeda nte ńkpọ oyọhọ ukpono ndidi eka emi enyenede eyen-eren.

Akańa Hannah

Nte ini akakade iso, mfuhọ esie ama akabare okpon akan, ndien usen kiet ke ini enye okodude ke itie usọrọ ke Shiloh, enye ama etiń ọnọ Abasi abańa mfuhọ esie. Esit ama ọdiọk enye eti-eti tutu enye ikekemeke ndidia udia. Enye ama ofiọk ete Abasi ama imọ, ke eyenyuń ańwam imọ ke ini baba owo ndomo kiet mikemeke ndinam esit enem enye. Enye iketińke ikọ isioro uyo ke ini enye ọkọbọńde akam ọnọ Abasi koro Abasi ama ekeme ndikut akam isọń esit esie. Ndusuk ini nnyin ńko imesibọń akam eti-eti tutu nnyin inyeneke ikọ eke idade iyarare mfina nnyin. Edi Abasi okut akam nnyin ye ediyak-idem nnọ eke nnyin inamde ye “mmum eke owo mikemeke nditiń.” Spirit Abasi esińwam nnyin ke utọ mme akam oro, ndien nnyin ibọ ibọrọ.

Nte Hannah ọkọbọńde akam, enye ama etiń ọnọ Abasi nte enye mikokopke idaresit koro enye mikenyeneke nditọ. Enye ama ọńwońọ ọnọ Abasi ete, edieke Abasi edinode imọ eyen-eren, imọ iyefiak iyak eyen oro inọ Abasi kpukpru usen uwem esie, ndien akarań iditukke enye ibuot. Ndiyak idet ọkọri ekedi kiet ke otu akańa emi mme Nazarite emi ekesiode idem mmọ enim sańa-sańa enọ akpan utom Abasi ekenamde. Akańa emi ekeme ndibighi ke ńkpọ nte urua kiet, ofiọń kiet me ofuri ini uwem.

Ke ini akwa oku, Eli, okokutde nte mkpọk-inua Hannah enyeńede edi ikopke uyo, enye ama ekere ete ke enye akakpa mmin. Enye ama etiń ọnọ enye ete ke mfuhọ imọ anam imọ ibọń ọkposọń akam tutu mkpọk-inua imọ ikpọń-ikpọń enyeńe, edi enye iketińke inọ enye se akam esie ekedide. Ke Eli okutde ete ke imọ ikenenke ke ubierikpe imọ, ama ososọp ndidọń enye esit. Enye ama ọbọń akam ńko, ete Abasi ọbọrọ akam esie onyuń ọnọ enye uwak edidiọń.

Inemesit Oto Ke Mbuotidem

Hannah ama enyene mbuotidem ete ke Abasi ama okop akam imọ ndien ke Enye eyenọ imọ se imọ iyomde. Enye ama enyene uyuhọ nte ńkpọ eke enye ama ekenyenyene oro, koro Ikọ Abasi etiń ete enye ama adia ńkpọ, “ndien iso ifuhọke aba enye.” Mbuotidem esie ama anam enye adat esit.

Ini Ediyak-idem

Ke ndań-nsiere, ke ini Hannah ye ebe esie ema ekebeńe idem ndinyoń ufọk, mmọ ebemiso eda kańa ini ndikpono Abasi. Nnyin ikpenyeneke ndidu ke nnyekidem ndisosọp mbine mbubehe nnyin ke usuń nte nnyin mikemeke ndida ini ndikọm Abasi ke mme mfọn Esie, nnyuń mbeńe nda-usuń Esie ke ofuri usen; ndien nnyin ikpọnyuń ikot Ikọ Esie man ifiọk se idide uduak Esie ke abańa nnyin. Ndusuk Enye enyene sańa-sańa edidiọń me eńwońọ ọnọ nnyin ke usen ekededi ndien nnyin itaba mfọn Esie koro nnyin itrede ndikot Ńwed Abasi. Ndifiọk uduak Abasi okpon akan ńkpọ efen ekededi ke uwem nnyin. Edieke nnyin isinde Ikọ Abasi, nnyin itaba ukpeme emi Enye ọnọde nnyin ke abańa asua ukpọń nnyin.

Hannah Eti

Hannah ama ańwańa esit ọnọ Abasi onyuń onim ke akpanikọ ete ke Enye eyebọrọ akam imọ; ndien ke edikem ini Samuel ama amana nte utip mbuotidem esie. Enye ikefreke akańa emi enye akanamde ndiyak enye nnọ Abasi man anam utom ke Itie-ukpono Abasi ke ofuri eyo uwem esie. Enye ama ama eyen esie eti-eti, ndien ekpekedi mmem-mmem enye ndidọhọ ete ke Abasi ọkọnọ eyen emi man imọ inyene idaresit, ndusuk ke Enye idiyomke eda eyen oro ekenim ke ufọk-Abasi man odu do kpukpru ini. Enye ama eti eńwońọ emi enye ọkọńwońọde ọnọ Abasi;

ndien ke ini Samuel ama okokpon ekem nte ekpedianarede ekpōñ eka esie, enye ama ada enye ọsọk Eli, akwa oku, man anam mme utom emi enye ekemedede. Samuel ekedi nsọñ-urua enọ emi enye ọkọnọde Abasi.

Enọ Utip Nwa-idem

Abasi ama okpono uwa Hannah onyūñ ọnọ enye nditọ iren ita efen ye nditọ iban iba ndisin idara ke ufọk esie. Abasi esinọ utip uwa emi nditọ Esie enamde, onyūñ ọñwọñọ ndinọ mmọ emi ebemde iso eyom Obio-ubọñ Abasi ye edinen-ido Esie ekese.

Hannah ikereke utom esie ke ibuot Samuel nte eka, edi esika ke Shiloh ke isua ke isua ye ekpri ọfọñidem emi enye ekesikimde ọnọ enye.

Ekpri Eyen Eyeda Mmọ Usūñ

Samuel ama anam akpanikọ ke Ufọk-Abasi tọñọ ke ini emi enye ekedide eyen-ọwọñ. Ndusuk owo ekere ete nditọ ekpenyene ndikọri n̄wọrọ owo mbemiso ekpep mmọ n̄kpọ ekededede ebaña edu-ukpono Abasi. Mmọ ekere ete nditọwọñ ikemeke ndifiok mme n̄kpọ Abasi. Edi mfefere esit akpanikọ nditọwọñ esisọp omum ndisana ukpep-n̄kpọ Abasi ekan ndiọi, mbiara esit ikpọ owo. Nnyin imokut ediwak nditọwọñ emi emade Jesus tọñọ ke ini emi mmọ ekemedede nditiñ ikọ, ndien ndusuk mmọ esibọ ata erinyaña ke ini mmọ edide kaña isua inañ me ition. Ke ediyak esit mmọ nnọ Jesus ke ini mmọ edide ata n̄kpri, mmọ ebọhọ afanikọñ ye mfuhọ emi idiok-n̄kpọ adade edi.

Akwa Owo Abasi

Nnyin ikop ite ke Samuel ama okpon akabare utibe owo Abasi. Ke ebade enye ndidi oku ke Ufọk-Abasi, enye ekedi akpatre ebere-ikpe emi ekedide ada ibuot-ukara ke Israel. Kere utọ idaresit emi Hannah ekenyenede ndikut eyen esie ke utọ idaha oro ke n̄kpọ Abasi ye ke ukara Israel! Ntre ke ekenọ utip ediyak idemesie nnọ Abasi oto ke uwem owo Abasi emi akpa eyen esie okodude.

MME MBUME

1. Mmọñ ke Hannah ye Elkanah ekesika kpukpru isua? Nso idi ntak?
2. Nso idi ntak emi Hannah mikenyeneke inemesit?
3. Hannah eketiñ mfuhọ esie ọnọ anie?
4. Nso ke Eli akanam ke ini enye ọkọfiokde abaña mfuhọ Hannah?
5. Nte Hannah ama onim Abasi ke akpanikọ ke ndo-ndo oro? Nnyin inam didie ifiok?
6. Nso ke Hannah ọkọñwọñọ ndinam edieke enye edinyenede eyen-eren?
7. Nte enye ama anam eñwọñọ esie?
8. Nso ikedi utip esie?